

Ngoenzhaenx Gou Gamjdoengh Lo

Daudwz ndei, couh lumj duj fwj hau gwnzmbwn lamzsis, hawj swnghhoz raeuz dem le geijlai gyaunde.

——Daezgeiq

Miz vunz cam: “Swnghhoz mwngz noix gijmaz ne?” Gyoengqvunz hoizdap gакcungj gakyiengh, gou nyinhnaeuz ndaw swnghhoz noix daudwz ndei. Danghnaeuz gyoengq-raeuz bouxboux cungj gangj daudwz, swnghhoz raeuz couh engq gyaunde lo. Gij saeh ngoenzhaenx caen hawj gou gamjdoengh lo.

Gij Hengzdoengh Ndaw Fwn

“Sam nyied sam” dwg ciet Bouxcuengh raeuz, ngoenzhaenx miz haujlai bouxhek daj gak dieg daeujdaengz Vujmingz, daeuj caeuq gyoengqraeuz caez gvaq ciet, daengx aen singz Vujmingz cungj yienj ndaej gig nauhnyied.

Ngoenzhaenx gwnzmbwm fwnsai lumj bwnvaiz mbinfifi, gou gang liengj gag byaij youq gwn loh, giceh youq gwnz loh fwt bae, gij raemxfwn sinz hwnjdaej yiengj sasa. Henz loh miz boux daxgoeng byoemhau ndeu, de daenj buhfwn dwk, gij raemxfwn swnh buhfwn lae daengz dinvaq de. Hoeng

那天我感动了

武鸣县太平镇庆乐小学六年级 危泓瑾

de mbouj dawzhaeujrwz saek di, de gungjhwat dwk gip gij nyapnyaj henz roen, yienzhaeuh baez yamq baez yamq byaij bae coh aendoengi nyapnyaj, yienj ndaej gig dwgrengz. Yawj daengz neix, gou siengj: “Gou dwg boux hagseng, nanzdauh mbouj wnggai vih aensingz gyaunde okrengz ma?” Gou swnhfwngz hix gip gij nyapnyaj henz ndang cuengq roengz aen doengj cuengq nyapnyaj haenx bae.

Goenglax haenx gij hengzdoengh de hawj gou gamjdoengh, gou vih bonjfaenh dwg boux hagseng gangj vwnzmingz ndeu gamjdaengz ndaengmoj.

Roxyiuj

Fwn ciemhciemh dingz lo, daengngoengz loh’ok fajnaj, gwnzhaw vunz lai dangqmaz, giceh byaij bae byaij dauq, goenglax haenx vanzlij youq henz loh gip nyapnyaj. Miz doiq hauxseng ndeu miz gangj miz riu byaij gvaqdaej, gyoengqde swnh-

fwngz gveng nyapnyaj, baetbaet fwngz couh yaek byaij bae gizgyae, goenglax yawjraen le, byaij gvaqbae gip dawz gij nyapnyaj, laengz gyoengqde: “Hauxseng ha, mwngz baenzlawz luenh gveng nyapnyaj ne? Ngoenzneix dwg ciet ‘sam nyied sam’, mbouj ndaej vaihnaj vunz Vujmingz ha!” Hauxseng najmong lo, vaiqviet gip gij nyapnyaj henz ndang hwnjdaej, goenglax haenx yawjraen le, fajnaj yiemzsuk haenx gaengq bienj ndaej unqswnh riunyumj lo.

Gij hengzdoengh goenglax hawj gou gig gamjdoengh, gou rox le, baujhoh vanzging yaek baengh daihgya, hix dwg gij cwzyin gyoengq-raeuz.

Daudwz Ndei Ciengz Youq

Muengh aen ndang byombeng-beng haenx, gou sawqmwh gamjdaengz goenglax dwg yienghhaenx hungmbwk, yienznaeuz gij hengzdoengh de mbouj suengq gijmaz, hoeng de yungh cik fwngz de baujhoh “ranz”



raeuz, baujhoh vanzging gyaunde raeuz. Seizneix, vanzging yied daeuj yied ca, ndaw hoengheiq PM2.5 yied daeuj yied sang, danghnaeuz gyoengqraeuz caiq mboujrox baujhoh vanzging, mbouj gvaq geijlai nanz, gyoengqraeuz lienz “ranz” cungj mboujmiz lo.

Sevei cingqcaih mboujduen h fazcanj, seizdaih couh yaek gyau daengz ndaw fwngz gyoengqraeuz, gyoengqraeuz wnggai doxgiet youq itheij baujhoh vanzging, baujhoh “aenranz” gyaunde gyoengqraeuz, sawj mbwn engq lamz, raemx engq saw, dieg engq cengh, engq heu.

Ngoenzhaenx gou caen gamjdoengh lo.

(指导老师:陆全耀 林锦凤)

goj lwgnyez

Roeggumj Dam Guhcaemz

贪玩的鹌鹑



Roeggumj iq youq ndaw doenghnaz, de gig maij youq ndaw doengh youz bae youz dauq, yawj funghgingj gyaunde, lij haengj ciengqgo diuqfoux.

Ranznden de dwg nounaz, duz iq neix mbouj maij gangjavah, engq mbouj yungh gangj ciengqgo diuqfoux lo, di yinx ndeu hix mbouj miz, cij haengj mbon congh caux rongz. Roeggumj mbouj maij de saekdi.

Seizcin daeuj lo, mbungqmbaj gyaunde daeuj lo. Mbungqmbaj daenj vaqbuh lengjilili, diuq gij foux ndei yawj raixcaix. Roeggumj angq lai lo, de couh haengj caeuq mbungqmbaj guhcaemz guh’angq.

Seizhah daeuj lo, daengngoengz ndatyanyan. Mbouj rox daj gizlawz senj daeuj gyoengq roeghanq ndeu. Youq gwnz raemxdah,

roeghanq iq baenz ngoenz bek fwed fafa, mbouj rox mbwq mbouj rox baeg. Roeggumj cam: “Sou ndaej hoengq mbouj yietnaiq, baenzngoengz bekwed, mbouj baeg ma?” Roeghanq iq naeuz: “Gou cingq lienh fwed yaek mbin sang ne. Dou aeu mbin bae giz gyae gvaq doeng ne.” Roeggumj naemj: “Gou couh mbouj bae baenz gyae, beg sinhoj.”

Seizcou daeuj lo, mbwn lamz fwj hau, baenz gyoengq roeggeuq guhdaih mbin daeuj dot haeuxgok caeuq ceh rum gwn, yaephe, youh baenz gyoengq mbin deuz lo. Yienghneix baebae dauqdaeq. Roeggumj yawj mbouj gvenq lo, cam: “Sou vihmaz cungj mbouj dingz roengzdaej guhcaemz ne, baebae dauqdaeq geijlai mazfan.” Roeggeuq naeuz: “Dou cingq bwh haeuxliengz gvaq doeng ne.” Roeggumj naemj: “Gizgiz miz gij gwn, bwh gijmaz?”

Haemq nanz mbouj raennaj lo, roeggumj siengj bae ra nounaz, lwnh de swheij raen gvaq gijmaz dingq gvaq gijmaz, hix hawj de angqmaengx.

Nounaz gaengq guh ndaej rongz moq ndei, demh le caengz haz umq nanwtntw ndeu, lij comz le baenz doi baenz doi haeuxliengz. De simgip dwk doiq roeggumj naeuz: “Mwngz bae gizlawz guhcaemz lo, wnggai guh rongz youq vuen di lo, caemhcaiq

lij aeu miz aen dieg ndeu yo doxgaiq, seizdoeng yaek daeuj lo.” Roeggumj naeuz: “Mwngz duz huk neix, vunz guh ranz mwngz hix guh rongz. Ganj haeux yied maj yied sang lo, haeuxgok yied daeuj yied fag lo, ndaw doengh mbouj couz gwn mbouj couz youq, yungh ndaej daengz ma?”

Roeggumj laebdaeb dauq-cawq youzlangh, gizlawz ndei guhcaemz couh bae gizlawz.

Gig vaiq, vunz gvej haeux sou hwnjdaej lo, ndaw doengh hoengqhathat lo.

Rumz sae yied daeuj yied gengx lo, roeghanq bek fwed mbin deuz lo.

Rumz baek daeuj lo, doek nae lo, gizgiz mbwn nit deih gengx, doenghduz cungj ndoj haeuj rongz bae mbouj okdaej lo.

Ndaw naz caiq hix ra mbouj ndaej gij gwn lo, roeggumj youh nit youh iek. Gyawj haemh, de gipgip muengzmuengz lamx di haz ndeu, luenh dap aen rongz ndeu, ndoj haeuj ndaw bae, de nit dwk saenzdedded, de siengj ciengq go gaj haemzhoj: “Saenzdedded, rumznit gengx dai gou, ngoenzcog couh guh rongz nanet. Saenzdedded, rumznit gengx dai gou, ngoenzcog ragwn dungx rimbyed.” Singgo yied daeuj yied daemq yied daeuj yied cax.

Byonghhwnz, roeggumj dai lo. (Ganh Sozvwenz/甘说文)

Daxgoeng Gai Byaek

卖菜的老爷爷

Ngoenzneix dwg gou guh cawjranz, banhaet gig romh couh hwnq lo, gienh saeh daih’it couh dwg cawx byaek, neix sawj gou gig gyauejdot, aenvih mbangj boux gai byaek mbouj dwg ngaek dacaengh, couh dwg gai gij byaek rwix hawj vunz, lumjnaeuz gai gij bitgaj gaeqgaj haenx cungj haeujraemx.

Gou dawz di ngaenz he, bae daengz diengzhaw. Byaij daengz doeksat, cij daengx youq dangqnaj goenglax he, sim siengj: Danghnaeuz caiq mbouj cawx byaek, couh fwngzbyouq baema ranz lo. “Baengzyoux iq, siengj cawx byaek ma?” Daxgoeng cam gou, gou naeuz: “Gij byaek mwngz baenzlawz gai ha?” “Sam maenz ngaenz gaen,” “gou cawx sam gaen.” Gou naeuz, mwh daxgoeng cang byaek hawj gou seiz, gou sijsaeq yawj de: Byoemgyaeu de lij haemq ndaem, ngamq miz saek diuz saek diuz byoem hau, buh de miz di gaeuq lo. Yawj ndaej ok, ranz de haemq gungz di. Seizneix daxbuz he byaij gvaqdaej, daxbuz cam: “Gij ho neix gai geijlai ngaenz gaen?” Daxgoeng naeuz: “Gou gag ndaem, mbouj yungh maz bonjcienz, mwngz seizbienh aeu di he baema gwn ba.” …… Lajmbwn gingqyienz miz gij doxgaiq mbouj aeu ngaenz, daxgoeng neix caen ndei. Daxgoeng gaengq bang gou cang byaek roengz daeh ndei, daengq gou dawz ndei, gaej hawj doek lo. Gou hawj cienz hawj daxgoeng le angqvauvau ma ranz lo.

Yienznaeuz gij byaek haenx gou caeux couh gwn liux lo, hoeng gou lij mbouj rox lumz goenglax haenx.

(haj nienzgaep Maj Vaz)